

manganu siutuasamahlua

marua ucani kari amihla, mutuasamahluna ia tuahlu matikurua hla
paungua tihla'ahlu, tam mavacangu sitakuamia mutuasamahlua, ausi ucani
mavacangu tikuru, patikurani tihla'ahlu, tamucua cucu'u masalangusangu.

atuhlungu akuku mainimana, mairahlu matumuhlua ahlamu pulauvu
ihlaku, maru ucani mataingalu anauaku ahlamu hlitucuncuncu'a, mara
anaiku pahlivinga miungu kutuahlua cucu'upitituisana, maniki kuavacangu
angatu ia, hlipiracaucauisa tamAruuai ihlaku hlipaumamainia pahlivinga,
maniaku malusapua hla kumita suhlatu, musasasala ia rianu ahlahlaviku,
kuamu arupapiacikiri, ausicua kana'ana mataingalu mavacangu tukucuku
pulaovu ihlaku, micalivi matumuhlu caihli.

maru ucani aari, hlimilavaiku mucukuhlu mahlukua saliaaku
takuliliungu, angahli maini tamucuamu arukavacangu, marumukuamu
psaulusu pasaulaula'u, taruacucuvungua hlamama arupakakari, ruavica
ihlakua hlimilavau marikuatataraku pasaulusuisana, pasaulaula'u,
matumuhlua ahlamu matataraku, makani'i pasamiana tumucuamu
masasangaru, taratuaulu kana'ana, hliaku langica taru ahlamu
hlitucuncuncu'a, musa mukakakuaisana, kani'i hlitucuncuncu'ana tuahlu i

uvuraisana ihlaku, amihla pakisuahlai, kani'i ahlamuna, anaiku angatu,
pitutua ihlaku kua uvura, tumangicua kana'ana, mucukuhlu hlamama
pakisuahlai, apavuraisana ihlaku, amihla ina'ana, avurisanaka hlimilavau
kana'ana, tumimahla rumahlau tumangicuaku mumua.

sapatiala hlimilavauna, mu'alivatuh kucutangii, mutusamahlicua sapisa,
kucutakuliacua tukuh sapisa, pakipuhlu sapi mutusamahluna,
mu'alivatuh apululamikicu mumua tikiku, alaicuamu mumua masasangaru,
rianicu mumua pakipuhlu siutua samahluna.

kani'ia manganuisa'aimana ia mutuasamahluna, ausi hlitakungahla
macuaku pacupucungu siutuasamahluna ia, ihlaila masasarua, mataingalu
mavacangu kari, siutuasamahluna tuahlu uvura cucu'u manganu, uvura
cucu'u manganu tukuh hla vaasu, ihlaila mumua apasamanganu, ma kani'i
sasaruanana, maci rianu umarua, sipacaca umahlikua ikatumahla cucu'u ia,
ma sipacucupungaku, tuturu mara mataingalu mavacangu.

(文章大意 僅供參考) ※字數限 200 字

微笑的魔力

微笑像是一件華麗的衣裳，把它穿在身上，是如此動人。小時候我有個珍惜的娃娃，是姑姑送我的生日禮物，它陪伴我度過好多年。一次，表弟來家裡，發現了那個娃娃。長輩要我把玩具給他，我也委屈地哭了。姑姑說會再幫我買一個一樣的，我不甘心地送給弟弟，弟弟的臉上露出微笑，我的嘴角也不自覺上揚。

我發現微笑如此有影響力，微笑是世界上最美的語言，可以給人動力，也是一種鼓勵，這個世界若充滿笑容，肯定會變得更美好。